



→110318.FFUoanSWF

Oan:

- de leden fan de Gemeenteried
- it Kolleezje fan Boargemaster & Wethâlders
fan de gemeente Súdwest-Fryslân
Postbus 10.000
8600 HA SNITS

Drachten/Itens, 18 maart 2011

Underwerp: taalbelied Súdwest-Fryslân by it beânderjen fan Frysktalige brieven

Achte leden fan de ried, achte boargemaster en wethâlders, achte griffier,

1. De *Feriëning Frysk Underwiis* hat jimme op 23 febrewaris 2011 in Frysktalich brief stjoerd oer de korrekte Frysktalige foarms fan de plaknammen en de gemeentenamme. Al op 25 febrewaris mochten wy it formele berjocht ûntfange dat ús brief oankommen en registrearre wie ûnder nûmer 111.002787. Dat is tige flot. Us tank dêrfoar. Graach sjogge wy anst besluten oer dy nammen yn 'e mjitte dy't folslein rjocht dogge oan de grutte rige kêsten fan it *Europees Hânfêst* fan de Rie fan Europa dy't Nederlân ûnderskreaun hat. Wy tidigje sadwaande op goed te ferantwurdzjen Frysktalige foarms. Dat is, lykas grif bekend, op grûn fan dat hânfêst net langer in geunst, mar in rjocht fan de Fryske minderheid yn Nederlân. Us Frysktalige toponimen hearre der dus net ûnder te strûpen.

2. Wat ús yn jimme formele reaksje opfoel, wie dat it oanbelangjende standertbriefke, dat út namme fan 'Burgemeester en wethouders van Súdwest Fryslân' ferstjoerd wie, yn it Hollânsk steld waard. Dat fernuere ús wat. Wy hiene op grûn fan de 'Oerienkomst oangeande Fryske taalbelied yn de nije te foarmjen fúzjegemeente Súdwest-Fryslân', sletten troch de boargemasters fan de eardere gemeenten, de provinsje Fryslân en de Steat fan 'e Nederlannen (ûnderskreaun op 1 maart 2010, dus al in goed jier ferlyn) wat oars ferwachte. Oer de bepalingen yn it Europeesk Hânfêst wurdt skreaun 'dat it besteande nivo fan taalrjochten fan de Fryske taal foar de ynwenners fan de dielnimmende gemeente net ferminderje mei (kêst 4, twadde lid, en 7, lid 1.b)'. Jimme taalbelied soe neffens dy oerienkomst basearre wurde op Europeeske ferdraggen en bilaterale oerienkomsten. Der soe yn de nij te foarmjen fúzjegemeente Súdwest-Fryslân (yn de oerienkomst al korrekt mei in keppelstreekje oanjûn) 'in *ambisjeus* taalbelied fierd wurde [...], sadwaande dat der sprake is fan *foarútgong* op dat mêd foar alle boargers' (s. 3).

Neffens de 'Nulrapportazje Frysk Taalbelied Gemeente Snits, Wymbritseradiel, Nijefurd, Boalsert en Wûnseradiel' (nov. 2010) wie it yn guon gemeenten (Wymbritseradiel, Wûnseradiel en Snits) it al lang belied en wizânsje om ek mei oaren (bgl. doarpsbelangen, skoallen, boargers en bedriuwen) yn it Frysk te korrespondearjen (s. 3). Dat hie fansels ek mei ús ûnderwiisferiening kinnen. It kin dochs net sa wêze dat in gemeentlike fúzje dy't ta doel hie om de bestjoerskrêft te fersterkjen, fuortdaliks al in efterútgong foar it brûken fan it Frysk betsjut. Dat is net bemoedigjend en net in goed foarbyld foar lju dy't de drompel fan it Frysk nommen hawwe en skreau yn dy taal. It is ek net in goed

foarbyld foar skoallen dêr't fan ferwachte wurde mei dat se harren bern/learlingen goed Frysk praten en skriuwen leare.

Faaks hat it 'Team Informatievoorziening' dat út namme fan B & W berjochten de doar útgean lit der sa gau net by stilstien of hat it tiim (noch) gjin amtner fine kinnen dy't it Frysk skriuwen yn 'e macht hat. Der komt ommers ek safolle op jin ôf yn in nije fúzjegemeente ... Wy tinke eins dat soks gjin ferlechje wêze meie soe. Ambysjes moatte wol blike, sels as it om in standert-antwurdbriefke fan mar seis rigels giet.

It noflike fan standertbriefkes is dat se net folle taalkennis en taalkreativiteit fan de amtners freegje en dat it stramyn altiten mar wer brûkt wurde kin. En dan is ek op dat mêd in goed begjin suver al it heale wurk. Winliken soe it Frysk yn de nije, grutte en sterke gemeente dus ek fandatoangeande net oan it efterste oer lizze moatte. En soe de ôfstân ta boargers en organisaasjes sa lyts mooglik bliuwe moatte as dy it derop weagje en brûk de 'eigen' rykstaal.

Wy hearre graach hoe't soks sa raar foar de hearen komme koe. En hoe't soks tenei oars en better sil.

Mei heechachtinge en freonlike groetnisse,

drs. Th. Dykstra, *foars. FFU*

drs. S.T. Hiemstra, *skr. FFU*

PS

Wy wolle ús wurdearring útsprekke foar de **Frysktalige** e-post-meidieling d.d. 15 maart 2011 fan jimme kommisjegriffier, dhr. M. Posthuma, dat ús brief fan 23 febr. 2011 taheakke wie oan de stikken fan de kommisje Bestjoer en Finânsjes fan 17 maart 2011.